

eaue excepte que en vng karesme deuant vng poure malade et moult faible il menga vng peu de potage pour atraire celui malade a la viande et le faire mengier adfin que par faulte de nourrissent pour la foiblesce de son corps il ne morust. Et avec ce durant les dis. xi. ans il jeunoit en pain et en eaue trois fois la sepmaine cest assauoir le mecredy le vendredy et le samedy. Es aultres jors ne mangoit il que vne fois tant seulement et vsoit de pain et de potage, excepte les dimenches le jor de Noel, Pasques, Penthecouste et de tous sains es quelz il mengoit deux fois. Et estoit son pain gros et rustican comme de auaine, orge, tercoeuil (son) ou de aultre mesleure. Son potage estoit de gros chous daultres herbes de feues ou de rappes le plus souvent affaities au sel sans aultre saueur et aulcune fois mais peu souvent y mettoit vng (peu) de farine ou de burre. Il ne goustea oncques de vin. xv. ans deuant la mort fors a la messe, apres quil auoit pris le corps et le sang de nostre Seigneur ou aulcune fois a la table de leuesque quant il mengoit avecques lui. Et lors avec son eaue mettoit vng peu de vin seulement pour la coulourer. Il jeuna vne fois. vii. jours routiers tous jors estant sain lie et haitie (dispos) sans boire et sans mengier.

Le dessus dit saint Yue vesqui cinquante ans ou enuiron tant seulement. Lequel en sa derniere maladie ne cessoit d'enseingnier ceulx qui enuiron lui estoient en leur preschant de leur salut et lui prevenant eurement a ses desrains jors pris les sacremens humblement du corps nostre Seigneur et la desraine vnction en son lit. Le benoit Yue, a grant priere et instance de ses amis, prist vng peu de paille dessoubz lui trois jors auant sa mort et son chaperon en lieu de cueure-chief estendu sur son chief vestu de la dicte cotte et couuert de sa houce, refusant aultre chose auoir, en disant quil nestoit pas digne dauoir plus vestu la haire empres la char. Lequel glorieux saint pur et net issant de ce monde lan de grace mil. ccc. et trois le. xix^e. jour de may qui fu le dimanche apres l'ascension nre Seigneur Jhesucrist sen ala nettement et glorieusement tout droit au ciel. Et tout ainsi comme se il se feust endormy sans nulle apparicion de quelconque douleur prist le bien eure repos de la mort.

Ainsi comme ou recorde ou liure piece compille de sa vie et de ses vertus on list que a son invocacion par veux et prieres a Dieu et a lui par plusieurs deuotement faictes furent en diuers lieux. xiiii. mors resuscitez en ce comprins deux enfans vifs ou ventre de leurs meres mors auant leur naissance qui depuis receurent vie et baptesme. Et a linuocacion de cestui glorieux saint furent. x. forsenez ou demoniacles deliurez de leur forsenerie et du malin esperit. xiii. contrais ou paralitiques furent restablis a sante. Trois auugles enluminez et plusieurs garis de la maille et de diuers maulx des yeulx. Pluseurs homes a tout leurs biens en diuers lieux tant en peril de mer comme aultre part furent sauuez et secourus par le benoit saint, vng ydropique fu entieremet saue et gary. Vng aultre aussi aiant la pierre grosse comme vng œuf et les genitoires enflus a la grosseur de la teste dun homme fu restitue a sante. Vng aultre condempne a estre pendu cheut par trois fois des fourches tout sain et entier fu deliure et laissie aler pour le miracle qui sur lui fu monstre.

Plusieurs malades furent garis de diuerses maladies et de diuerses douleurs seulement par atouchier le chaperon qui auoit este audit sait vne fois ainsi comme celui saint celebroit messe et quil leuoit le corps nostre Seigneur, vne grande resplendeur s'apparut enuiron celui corps de nostre Seigneur qui tantost aprez le leuacion parfaite et acomplie se desapparut.